

U Trai Jisu Khrist un sa wan biang sha kane ka pythei. Kane ka dei ka jingkular kaba U la kular 2000 snem mynshuwa (ioannis 14:1-3). Kumno phin tip da shisha ba Un sa wan biang? Sngewbha pule ia ki jingiathuhlypa (iathuhlypa) kiba U Jisu dalade U ong ba kin jia haba la kut ka por. Ka jingpule bniah ia kine ki jingthoh bad pyniahap ia ki bad ki jingjia kiba jia ha ka pyrthei mynta kan sakhi ba U Trai Jisu da shisha Un sa wan biang.

1 KA JINGPYNJOT IA KA TEMPLE

Haba u Jisu U la mih na ka Temple, katba u dang leit, ki synran ki la wan sha U ban pyni ia ki jyntei jong ka. "Hooïd", U la ong, "peit-thuh bha ia ki jyntei baroh. Nga ong ia phi: yn ym ieh noh hangne ia u maw; yn sa pyntwa lut khoit" (Matheus 24:1-2; Markus 13:1-2; Lukas 21:5-6).

2 KI JINGLANOT BAD KI JINGBANBEIÑ

Katba U Jisu U dang shong ha u lum Olib, ki synran – Peter, James, John bad Andrew ki la wan jar jar sha U, bad ki kylli, "Ha iathuh ia ngi lano kane kan sa urlong? Kaei ka dak jong ka jingwan jong Me bad ka jingwai ka pyrthei?" (Matheus 24:3; Markus 13:3-4; Lukas 21:7).

3 KINONGSHUKOR/NONGTHOK KIN BUN

U Jisu U la jubab: "To husiar bha ioh don ba thok ia phi. Bun ki briew kin wan ha ka kyrteng jong Nga da kaba ong 'Dei manga u Khrist!' bad kin shukor bun ngut (Matheus 24:4-5; Markus 13:5-6; Lukas 21:8).

4 KI THMA BAD HAMSAIA KI THMA

Phin iohsngew shaphang ki thma bad ki hamsaia jong ki thma: hynrei wat ia sngewdik. Kine kiei kiei ki dei ban wan jia,

hynrei ym pat dei ka bakut (Matheus 24:6; Markus 13:7; Lukas 21:9).

5 KI THMA HAPDENG KI RI OR HIMA | U JUMAI | NEMSNI EW OR KA KHLAM | KI JINGPANG JINGSHITOM

Nangta U la ong ia ki : Kawei ka ri kan ialeh ia kawei pat. Yn don ki 'nemsniew bad ki jumai kylleng sawdong (Matheus 24:7; Markus 13:8; Lukas 21:10-11).

6 Kine baroh ki long kum ki jingsuh khun kiba dang sdang (Matheus 24:8; Markus 13:8).

7 KA JINGSHAHLEHBEIÑ KI KRISTAN

Phi ia lade to sumar. Namar ki briew kin kem ia phi bad kin aiti ha ka jingbishar. Phin shah shoh ha ki sinakok; phin ieng ha khmat ki lat bad ki syiem na ka bynta jong Nga, Ia kane ka kyrteng phin ioh kabu ban ieng sakhi mynta (Matheus 24:9; Markus 13:9; Lukas 21:12-13).

8 Bad haba ki kem ia phi bad ki ring ia phi sha ka ing bishar, wat leit khuslai aiu phi dei ban kren; ynda poi ka por, sa ong ia kata kaba yn sa pyrsad mynsiem ha phi. Namar ki ktien ba phi kren kin ym long ki jong phi; kin wan na U Mynsiem Bakhuid. To kut jingmut ban ym khuslai lypa kumno phin iada ia lade; naba Nga Ngan sa ai ia phi ki ktien bad ka jingstad kiba ki nongshun jong phi kin ym lah ban ia airing ne ban pyniapnia (Markus 13:11; Lukas 21:14-15).

9 KA JINGSHETSHUKOR NA KA IING KA SEM

Ki briew kin aiti ia la ki hymen ki para sha ka jingiap, kumjuh ki kpa kin leh ia la ki khun; ki khun ruh kin ieng pyrshah ia la ki kmie ki kpa bad kin phah pyniap ia ki. Man la u briew un isih ia phi namar jong Nga. Hynrei

wat uwei u niuhkhlieh jong phi un ym duhei. To iaishah: da kumne phin pynim ia lade (Matheus 24:9-10; Markus 12-13; Lukas 21:16-19).

10 KA JINGIEID KAN PJAH

Haduh katne kan jytlei ka jingsniew, bad ka jingieid jong bun ki briew kan pjah. Hynrei uto uba iaineh haduh ka bakut, un lait im (Matheus 24:12-13).

11 Ia kane ka KHUBOR BABHA SHAPHANG KA HIMA yn ialap ha satlak ka pyrthei kum ka sakhi ha ki jait bynriew baroh. Tang hadien kata kan wan ka jingkut (Matheus 24:14; Markus 13:10).

12 KA JINGPYNJOT IA KA JERUSALEM

Haba phi la iohi ba la ker kut ia ka Jerusalem da ki kynhun shipai, to tip ba yn sa pynjot ia ka shen (Lukas 21:20). Phin sa iohi ia ka jingleh sang bashyrkhei ba ka ieng ha ka jaka kyntang, kumba la kren u nongiathuhlypa Daniel. (Jar uba pule to un sngewthuh!) Kito kiba don ha Judea ki dei ban phet sha ki lum. U uba don ha tnum iing ym dei ban pynlut por ban leit shim ei ei napoh iing. U briew uba don ha lyngkha, um dei ban leit phai sha iing ban shim ia la ka jaiñkup (Matheus 24:15-18; Markus 13:14-16; Lukas 17:31; 21:21). Katno ka jingkordit ha kito ki sngi ia ki kynthei kiba pun khun bad ai buiñ! To duwai ha u Blei ba kine kiei kiei kin ym jia myntlang ne ha ka sabath! (Matheus 24:19-20; Markus 13:17-18; Lukas 21:23). Don kiban kyllon da ka waitlam, bad ia kiwei pat yn ring mraw sha ki ri baroh. Ki Jentil kin sa iuhroit ia ka Jerusalem, haduh ban da kut ka ia jong ki (Lukas 21:24).

13 KA POR JONG KA JINGSHEMLANOT U JAKOB

(JERMEIAH 30:6-7)

Naba ki jinglanot ha kito ki sngi kin palat liam ia kano kano naduh basdang ka pyrthei haduh mynta, bad yn ym don shuh kum kine. Lada u Blei Um shem la pynlyngkot ia kito ki sngi, yn ym don bal ait im. Hynrei na ka bynta ki Balajied jong U, Un pynlyngkot ia kito ki sngi (Matheus 24:21-22; Markus 13:19-20; Lukas 21:23). Naba kine ki long 'Ki Sngi jong ka Kput', ban pynurlong ia ki jingthoh (Lukas 21:22).

14 KI KHRIST LAMLER BAD KI NONGIATHUHLYPA LAMLER

Te lada uno uno u ong ha phi 'Ha peit, U Khrist U don hangne!' ne, 'Ha peit, U don hangtai!' – wat ngeit ia u. Naba kin iapaw byllai ki khrist bad ki nongiathuhlypa lamler. Kin leh ki dak bad ki jingphylla ban shukor, lada lah, wat ia ki balajied jong u Blei. Te da sumar bha! Nga la iathuh lypa ha phi. (Matheus 24:23-24; Markus 13:21-23). Kumta lada ki briew kin ong ha phi, 'Hakhmih, U don ha ri Kynjah!' – wat leit shata; ne lada ki ong, 'Hakhmih U rieh hapoh iing! _wat ngeit satia. Naba u Khun u Briew Un wan kum ka leilieh kaba thaba ha ka suiñ bneng na mihngi shaduh sepngi (Matheus 24:26-27; Lukas 17:23-24).

15 KI DAK KI SHIN HA KA SUIÑBNENG

Hadien ka jingjynjar jong kito ki sngi, ka sngi kan sad um, u bnai un ym shai shuh, ki khlur kin hap na sahit bneng, bad ki bor



mariang kin sa kulmar (Matheus 24:29; Markus 13:24-25; Lukas 21:25). Ha ka pyrthei, ki ri baroh kin sa lyng-a mtanseim khait, da ka jingtieng ia ka duriaw kaba kyrhuh bad ia ki jingat-phyllung kiba byrthen. Ki briew kin sa iap-ler da ka jingtieng bad ka jingsyier ia kata ka ban sa jia halor ka pyrthei baroh kawei. Ia ki bor jong ka bneng yn sa pynkhywinwin (Lukas 21: 25-26).

16 Nangta ka **dak u Khun u Briew** kan sa paw ha suiñ; te baroh ki jait briew jong ka pyrthei kin ia iam haba kin iohi ia u Khun u Briew ba U wan ha ki lyoh ka bneng da ka bor bad ka burom bah. Un phah ia ki angel da ka jingput turoi bajam, bad kin lum lang ia ki Balajied jong U na ki sawlyer, na bakut sha bakut ka bneng (Matheus 24:30-31; Markus 13:26-27; Lukas 21:27).

17 Haba kine kiei kiei ki sdang ban jia, to sngewshngaiñ bad to sngewkmen, namar ka jingpynim jong phi ka la jan (Lukas 21:28).

18 To u dieng dymbur un ai jinghikai ia phi. Haba ki tnat jong u ki sdang khielung, bad ki sei sla, phi tip ba ka lyiur ka la jan. Kumjuh, haba phi iohi ia kine ki jingjia phin tip ba u lajan, u la don ha ka khyrdop (Matheus 24:32-33; Markus 13:28-29; Lukas 21:29-31). Ym don ba tip ia ka sngi ne ka por – lymne ki angel ha bneng, lymne u Khun; U tip tang u Kpa (Matheus 24:36; Markus 13:32).

19 Ka jingwan u Khun u Briew kan syriem ia kaba la jia ha ka por u Noa. Kumba ha ki sngi shuwa ka jingshlei, ki briew ki la iabam iadih, ki la iapoikha iapoiman, tad haduh ka sngi ba u Noa u la leit rung hapoh ka iinglieng – bad kim shym la tip, tat haduh ynda la wan

ka jingshlei bad ka la rong noh ia ki baroh – kumta kan sa jia haba wan u Khun u Briew (Matheus 24:37-39; Lukas 17:26-27).

20 Kan long kumba ka la long ha ka por jong u Lot; ki la byrnia ha ka bam ka dih, ha ka die ka thied, bad ki la thung ki la tei. Ha ka sngi ba u Lot u la mih na Sodom, ka ding bad u kyndok ki la hap kum u slap na bneng bad ki la pyniap ia ki baroh phar. Kumne kan sa long ha kata ka sngi haba yn pynpaw ia u Khun u Blei (Lukas 17:28-30).

21 To kynmaw ia ka tnga jong u Lot!. Jar uba pyrshang ban pynneh pynsah ia ka jingim un duh ia ka; jar uba duh ia la ka jingim un pynneh pynsah ia ka (Lukas 17:32-33).

22 Ha kata ka miet, Nga ong ia phi, yn don ar ngut kiba iathiah lang ha ka jynthiah: ia uwei yn shim noh, ia uwei pat yn ieh noh. Ar ngut ki kynthei kin iatylliat kew lang : ia kawei yn shim noh, ia kawei pat yn ieh noh. Ar ngut ha lyngkha : ia uwei yn shim noh, ia uwei pat yn ieh noh (Matheus 24:40-41; Lukas 17:34-36). Ki synran ki la kylli ia U, “Shano, ko Trai?” U Jisu U la jubab, “Kat haba don ka metiap, hangta ki pukni kin ialang” (Matheus 24:28; Lukas 17:37).

23 **KHMIHIIT BAD IAI LONG KIBA DUWAI**
Kan long kum u briew uba mih ban leit jingleit, bad u ieh noh ia la ka iing ha ki shakri, uwei pa uwei ba un leh la ka kam ka kam; u bthah ia u nongap khyrdop ban sharai. Te to iaisharai, namar phim tip lano u trai iing un wan – janmiet ne shiteng synña, haba kynih u syiar ne mynstep. Lada u wan kyndit kyndit um dei ban lap ba phi iohthiah! (Markus 13:34-36).

24 Kynmaw ia kane: lada u trai iing u la tip ia ka por ba u nongtuh un wan, un jin da la ap, bad yn ym da la shah ia u nongtuh ban prong hapoh iing. Na kane ka daw, phi ruh phi dei ban longbarabor kiba la khreh lypa, namar u Khun u Briew Un wan haba phim khmih lynti satia (Matheus 24:43-44).

25 To sharai ia lade! Wat pynbyrnia ia lade da kaba bam lalat, da kaba dih buaid, bad da ki jingklusai ka jingim, ioh kata ka sngi kan lap kyndit ia phi. Peit bad duwai, naba kan wan tyllap kum ka jingriam ha ki briew baroh satlak ka pyrthei (Markus 13:33; Lukas 21:34-35).

26 To sharai bad to duwai barabor ba phin long ki bakhlaiñ ban ia id khlem syier lyngba kine kiei kiei baroh kiban sa jia, bad ban ieng hakhmat u Khun u Briew (Lukas 21:36).

27 Nga iathuh ia phi ba kane ka pateng kaba mynta kan ym leit noh, shuwa bay n urlong kine kiei kiei. Ka bneng bad ka khyndew kin duh noh, hynrei ki ktien jong Nga kin ym duh satia (Matheus 24:34-35; Markus 13:30-31; Lukas 21:32-33).

To tieng-burom ia U Blei bad to ai nam ia U namar la poi ka ia ba Un shong bishar. To mane ia U Nongthaw ka bneng bad ka khyndew, ia u Nongthaw ka duriaw bad ki umpohliaw (Jingpynpaw 14:7).

YN YM PYN SLEM SHUH!

Bad ka Hima U Blei ka la jan. To kylla ka bamut bad to ngeit ia ka Gospel.

Da shisha U Trai Jisu Khrist un sa wan biang shen. Namarkata phi long kiba la khreh ban iakynduh bad U Trai U Blei jong phi ?



KA GOSPEL

JONG

KA HIMA



Ban tip kham bniah peit ia ka Angle TV
www.angeltv.org | www.jesusministries.org

KHASIAN | KHASI